



र 5/

# तुबारि

[www.pangi.in](http://www.pangi.in)अब अंग्रेजी, हिन्दी त  
पंगवाड़ी भाषा अन्तर असी।

Issue 77; 10/08/2018

## बिषय सूची

कुई	1
यक खरे मेहणु प्रार्थना	1
ईये त कोईये हसाब-कताब	2
आत्म-सम्मान कीं बधता?	3
दर्जी सीख	4
खास वचन	4

तुस बुन्ह दुतो नम्बर  
बठ फोन कइ सकते त  
अकाशवाणी जे बोक कइ  
सकते। तुस अपु मनपसन  
घीते शुण सकते। होर तुस  
अपु समाचार बी दी सकते,  
से बि पांगेई भाषा अन्तर।

AIR SHIMLA- 0177  
2808152

धाणि त तसे जुएली केआं  
अब सते बंटी अठ फेरे लवाण  
चाहिए। सत फेरे तेन्के व्याहे,  
आठुं जे फेरा असा, से कुई जे  
लवाण चाहिए कि  
से कुई बचांते त  
तेस पढान्ते ।



## कुई

ओशी यक तोपू ई भुन्ती कुई,  
अगर कऊं जोरि जुओई टाल त रोलती कुई।  
रोशन करियाल कुआ त बस यके कुल,  
दुई दुई कुले लाज बचांती ए कुई।  
कोई नेई दोस्ता, यक होरी केआं घट,  
हीरा अगर असा कुआ त शुचे मोती ई असी कुई।  
कंटी बइ भरिए बथ ए अपफ हंठती रेहंती,  
होरी के लिए फियुड बणती कुई।  
विधि विधान असा एईए दुनिये रस्म भुओ,  
मुठड़ी अन्तर भरो पणि ई भुन्ती कुई।  
गौरी ठाकुर



## यक खरा मेहणु प्रार्थना

ए परमेश्वरा, में न्याए कर, किस कि अउं खराई  
जोई चलो असा,  
त में भरोसा तोड पुठ हमेशा असा।  
ए भगवाना, मोउं जाच पड़ताइ कर कइ  
परख। में मन त दिल परख।  
किस कि तें दाह दया त  
तें टीरी के समाड़ी असी,  
त अउं हमेशा तें सच्चाई बथ हंठो असा।  
अउं निकमि चाल चलणे बाड़ी के संग ना गा,  
होर ना अउं कपटी जोई साते कोठि घेन्ता।  
मोउं कुकर्मो मेहणु के संगत हेर नफरत भुन्ती,  
त दुष्ट मेहणु के संग ना बिश्ता।  
अउं अपु हतऊ पापे पणि बइ ना धुन्ता,  
तोउं, ए परमेश्वरा अउं तें वेदी चोहरो कनार बइ फेरे लांता।  
ताकि तें धन्यवाद हुशरी दी दी कइ करु,  
त तें सोब चमत्कारी कमि के बारे बोल सकूं।  
ए परमेश्वरा, अउं तें स्वर्ग धाम, त  
तें महिमाई बिशणे जगाई जोई परेम रखता।

(बाकी वचो दोके पन्ने पुठ असा।)



## ईए त कोईए हसाब-कताब

बोक सुआ पुरणी भुओ, दुई धाणि जुएली थिए। तेन्हि यक कुवा जमा। कुवा जमण केआं पता तसे धाणि मरी गा। धाणि मरण केआं पता तेन जिल्हाणु मेहनत मजदूरी कर कइ अपु कुवा पाड़ा त पढ़ा लिखा। तेन जिल्हाणु हरेक किसमी कम कर कर कइ से कुवा इस लेख बणा कि यक रोज से पढ़ लिख कई बोड अफसर बण गा। तोउं तेन कोईए ब्याह कइ छड़ा। ब्याह केआं पता तसे जुएली तसे ईए बारे तेस जे रोज चाथि लांतीथ, कि से तसे पियोकैबाड़ी के लेख नेई। तसे जुएली मेहणु जे बोलुण शरम लगतीथ कि तसे राणि अनपढ़ असी।



बोक सुआ बधती गई त यक रोज कोईए अपु ईया जे बोलु, “ईया” अउं चाहांता कि अब अउं इस लेख भोई गओ असा कि कोई बि कर्ज भरी सकता, ताकि अउं त तू दुहे जेई सुखी रेही सकियेल। तोउं त आज तक तेई मोउं पुठ जतो बि सोब खर्चा कियो असा तसे सूद त ब्याज मियाई कइ मोउं जे बताण दे। अउं तेस भरी देन्ता। तोउं अस बखरे बखरे सुखी रहंते। ईए सोच कइ जबाव दता। “कोईआ, हसाब धिक लम्मा असा। मोउं सोच कइ बताण एन्तु। थोडा टेम लोता।” कोईए बोलु, “कोई जल्दबाजी नेई ईये। दुई चोउर रोजे बाद बताण दे।”



तोउं रात भुई त सोब जेई उंघ गए। ईए यक लोठू पुवाणी निउ त कोईए भखरी घेई गई। जठि कुवा उंघो थिया तसे बछाण पुठ यक कनारा पुवाणी छई छऊ। कुवा होर कना जे खिरक गा। ईए होर कनारा बि पुवाणी छई छऊ। कुआ जए जए जे खरकता रिहा, ई पुवाणी छती गई। तोउं परीशान भोई कइ कुवा खड़ी गा त ईया जे लेहेरी कइ बोलु “ईया तु कि करण लगो असी? में बछाण पूरु किस सेली छऊ?” ईए बोलु, “कोईआ, तेई मोउं जे पूरी जिन्दगी हसाब-कताब बणाणे बोलो थियु ना। अउं अभेई ई हसाब लाण लगो थी कि तेई मठड़ियार अन्तर बछाण सेली सेली कइ

मेई कति राती खाखड़ कटो असी। तें त इ पेहली रात भुओ बे कोईआ! तु त अभेई केआं डर गा ना? मेई त होता हसाब-कताब शुरु बि नेई कियो, जेस तु चुकाई सकियाल।” ईये अन्हि बोकी कोईए मन हिलाई छड़ा। से रात बड़ सोचता रिहा। तेस इ एहसास भोई गओ थिया कि ईये करज पूरी जिन्दगी भइ चुकाई ना सकते। ई ठन्हि शिलियारे ई असी। ई अपु गभुरु के लिए हरेक दुख, दरद, मुसीबत त कष्ट उठाण जे हमेशा तियार रहंती।

### पेहला पन्ने केआं वचो भाग....

में प्राण पापी जोई साते, त में जिन्दगी मेहणु मारी जोई ना मिया।  
से त घटिया कम करण लगोरे रहंते, त तेन्के देहणा हथ गुजि बड़ भरोरा रहंता।  
पर अउं त खराई जोई हंठता रहंता।  
तु मोउं छुड़काण दे, त मोउं पुठ दाह-दया कर।  
में खुर चोहरो कना सुसुर असे, अउं टजोट अन्तर तें धन्यवाद कता।



## आत्म-सम्मान की बधाण?

पिछले फेरी असी हेरो थिउ कि यक मेहणु अन्तर आत्म-सम्मान कमी किस भुन्ति। इस फेरी अस हेरते कि अस अपु आत्म-सम्मान की कइ बधान्ते। पेहला कदम असा ई कि असी पेहले अपु बारे सुसुर समझुण त पता लाण। किस कि जपल तकर अस अपु अपफ न जाणते, तपल तकर अस गलतफैमी अन्तर रेहन्ते त उलटे उलटे कम कते रेहन्ते। एस लिये जरूरी असु कि असी अपु अपफ ई पुछुण कि “अउं कोउं भो? इस धरती पुठ में की कम असु? होर मरण केआं पता में की भुन्तु?” ए से सवाल भो जेन्के जबाव अन्तर हैं आत्म-सम्मान टिगता।



अगर मेहणु के बोक मान कइ अस एन्हि सवाली के जबाव ठीक कते त हैं आत्म-सम्मान मेहणु के बोकी के ई उडरता रेहन्ता। कदी खरा त कदी बुरा। मोउं पक्का यकीन असा कि तुसी अपु गीहे बाड़ी केआं जरूर शुणो भोल, जे तुसी जे कदी खरू त कदी बुरु बोते। पर आत्म-सम्मान बधाणे लिये असी तेस केआं शुणुण लौतु, जेसे बोक कदी ना बदलिन्ती। से भो भगवाने या परमेश्वरे बोक। तुसी पता लाण असा कि भगवान तुं बारे की बोता। से कि तुसी ‘बानर केआं बणो होरा यक प्राणि भो’ बोता, ना ‘तुस सुआ खास असे’ बोता, जेन्हि से अपु हतेउ बइ बणो असा? मोउं लगतु कि जपल अस अपु अपफ केस जानवरी केआं बणो होरा यक प्राणि मानते त असी अपफ अपु सही पेछाण नेई कइ बटो। किस कि मनख जानवरी के ई पूरी उमर सिर्फ खाई पी कइ मरण ना चाहन्ता, बल्कि से अगरी त पतूई बारे सोचता, होर सोच कइ अपु सुहलियत कता। संसार अन्तर सिर्फ मनख यक ई प्राणि असा, जेस सही त गलते एहसास भुन्ता। मोउं पूरा यकीन भोई गो असा कि हैं बुछ ई कोई बि नेई जे जानवरी के ई सिर्फ अपु जिन्दगी बारे सोचता। सोबी मेहणु के इच्छा भुन्ति कि से कुछ खास करे, जेसे बेलि मेहणु के फायदा भोल। त अगर असी मनखे एती सुहलियत किओ असी, त ए एस सोचे बेलि ई किओ असी। इस बझई जोई अउं समझता कि आत्म-सम्मान बधाण लिये पेहले तुसी पता करण असा कि “तुस कोउं भिन्थ”।



दोका त टेका सवाले बारे तुस अपफ सोचीण दिए। तुस अपु मन अन्तर अपु बारे जे मानते, से कि जिन्दगी हर टेम अन्तर टिग सकता ना? धिक सोच कइ हेरे। आत्म-सम्मान बधाण जे असी भगवान केआं शुणुण जरूरी इस लिए असु, किस कि जपल अस परेशानी अन्तर भुन्ते, दुख तकलीफ अन्तर भुन्ते त असी भगवाने याद एन्ती। होर अस दुआ प्रार्थना, त पूजापाठ बि कते। अगर असी यक लिंग सुसुर पता चलियेल कि हैं बारे से की बोता, होर हैं बारे की सोचता, त हर यक औखि टेमे सामणा अस पूरे हिम्मत जोई कइ सकते। अगर अस मानते कि अस जानवरी केआं बणो असे त धरती पुठ हैं जीणे कोई मकसद नेई। पर अगर अस मानते कि भगवाने अस बणो असे त जरूर धरती पुठ हैं जीणे कोई मकसद असा। अस बगैर कोई मकसदे खरी जिन्दगी जीं ना सकते। जे जे मेहणु ईहांणि जीन्ते, तेन्हि जे अस अवारे, लफंगे बोते। पर अगर अस चाहन्ते कि मेहणु हैं बारे खरू बलियेल त असी यक मकसद घिन जीण एन्तु।



तुबारि पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ भाषा सुहलियत करण जे यक मंच देण लगे असी।



## दर्जी सीख



यक दर्जी थिया।  
तसे यक कुवा थिया,  
से स्कूल पढ़ताथ।  
जिखेई तसे स्कूल  
छुट्टी पड़ी त से यक  
रोज अपु बोट जुओई

तसे दुकान गा। तठि घेई कई से अपु बोट ध्यान जुओई  
हेरता रिहा कि कीं कम करण लगो असा? तेन हेरु कि  
तसे बोट कीं कैची बड़ झणे काटता त कैची खुरे भेड़  
जंघी बड़ चिकि रखता? फि सनआणी बड़ झणे सीता त  
सी कई सनाण अपु टोप जुओई लाई छता।

जपल तेन कोईए अपु बोट ई कता 4-5 लिंगि कआ  
त तेस केआं चुप बिशिए नऊ। तोउं तेन कोईए अपु  
बोट जे बोलु “बोटआ अउं तुसी केआं यक बोक पुछण  
चाहांता।” बोटए बोलु, “कोईआ, बोल की पुछण  
चाहांता?” कोईए बोलु, “बोटआ, अउं सुआ टेम केआं  
तुसी हेरण लगो असा,  
जपल बि तुस झणे काटते,  
तढ़िया पता कैची अपु खुर  
पढे चिक रखते, त सनाणी  
बड़ झणे सीण केआं पता  
तेस तुस अपु मगरी पुठ टोप जुओई लाई छते। ई  
किस?” एस बोकी, जे जबाव बोटए दुतु तेन्हि दुई लेनि  
अन्तर माने कि तेन्हि पूरे जिन्दगी मतलब समझाई  
छड़ा। जबाव थियु, “कोईआ, कैची काटणे कम कती, त  
सनआण जोड़णे कम कती, त काटणे बाड़े जगा हमेशा  
घटिया भुन्ती, पर जोड़णे बाड़े जगा हमेशा बधिया  
भुन्ती। एईए बड़ा असी कि अउं सनआण टोप पुठ  
लांता, त कैची खुर पड़डे रखता।”



## तुबारि मासिक पत्रिका

- ◆अस इ उम्मिद करुं लगो असे कि एण बाड़े रोज अन्तर सुआ मेहणु इस कम अन्तर साथोट देन्ते।
- ◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पदुं जे त भाषाई सुहलियत करण जे इ पत्रिका शुरु किओ असी।
- ◆तुबारि यक अवाणिज्यिक पत्रिका भो।
- ◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगो। अगर कोई ई सोचता बि त अस जिम्मेबार नेई।
- ◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ◆आर्टिकल्स ना मिले, या घाटि मेहणु के साथोट ना मिले त तुबारि पत्रिका कदी बि बंद भुई सकती।
- ◆कोई चीज छपां असी या नेई छपां जे तुबारि संपादकीय टीम पुरा अधिकार असा।
- ◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव ओर आर्टिकल्स रखुं जे सुविधा किओ असी।
- ◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा आर्टिकल, पुराणि या नोई कथा, कहावत, कविता, त नोई घीत (पागवाडी अन्तर) लिख कइ छपां जे हेँघे दिए।

### तुबारि संपादकीय टीम

- ☎ 9418429574
- ☎ 9418329200
- ☎ 9418411199
- ☎ 9418904168
- ☎ 9459828290



## खास वचन

- गलती नीमे बूटे नेई कि से कोड़ा असा, खुदगरजी त जिभुणु असी, कि जेस मठा पसन्द असा।
- नराज न भुण कदी ई सोच कइ कि कम में त नऊ केसे होरी भुण लगो असु, घी त रुई हमेशा केईया जईते अओ असे, त मेहणु बोते दीया जाओ असा।
- ईन्सान ऊनि बिश कइ पैसा गणता, कि हि अत थिया आज अत बधी गा, ऊपरबाड़ा हसता त इन्साने साँस गिणता, कि हि अति थी आज अति घटी गई,
- दुनिए इस रैन बसेरे अन्तर पता नेई कत रोज बिशुण असु, त जीते जी सोबि के मन अन्तर बसे, एईए त सोबि केईया अबल जिन्दगी गेहड़ा भुओ।